

दिनांक 26.07.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- मुख्यमंत्री भजन लाल शर्मा टूट्या-फूट्या सरकारी भवनों की मरम्मत का काम माथे खास ध्यान देवण का हुकम दीना।
- भारत अर ब्रिटेन बीचे व्ह्या मुक्त व्यापार समझौता-एफ.टी.ए. ऊं राजस्थान ऊं दिसावर मांय बिक्री का मौका मांय बघोतरी की उम्मीद।
- प्रधानमंत्री नरेन्द्र मोदी आज मालदीव का स्वतंत्रता दिवस समारोह मांय शिरकत कीनी-काल आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला ।
- 76वां वन महोत्सव का तैत काल प्रदेशभर मांय पौधा रोपण का कार्यक्रम राख्या जावेला- राज्य स्तर रो वन महोत्सव कार्यक्रम जयपुर मांय व्हेला।

मुख्यमंत्री भजनलाल शर्मा झालावाड़-मनोहरथाना स्कूल हादसा ने ध्यान राखता थकां टूटा-फूटा सरकारी संस्थानां, स्कूलां अर आंगनबाड़ी भवनां की मरम्मत का काम माथे खास ध्यान देवण बाबत कह्यो है। वे डांग, मगरा अर मेवात क्षेत्रीय विकास योजना का तैत संस्थानां अर भवनां की मरम्मत सारू मंजूरशुदा रकम 15 फीसदी ऊं बधा र 20 फीसदी करण रो फ़ैसलो कीनो है। अब विधायक ई स्थानीय क्षेत्र विकास योजना का तैत आं भवनां की मरम्मत का कामां सारू सालाना आवंटन की बीस फीसदी रकम खर्च कर सकेला। ध्यानजोग है के झालावाड़ जिला का पीपलोदी स्कूल हादसा पाछे मामला की आला दर्जा की जांच सारू समिति बणा र वां ने पांच दिन मांय रपट पेश करण बाबत कही ज्यो है। दूजी कानी जोधपुर मांय देवस्थान अर पशुपालन मंत्री जोराराम कुमावत कह्यो के हर जिला मांय जूना भवनां रो सर्वे करायो जावेला।

राष्ट्रीय मानवाधिकार आयोग प्रदेश का एक बिजलीघर परिसर मांय मजूर की मौत पाछे राज्य का मुख्य सचिव अर अजमेर पुलिस ने नोटिस जारी कीनो है। ओ वाकयो नाळियां सारू खाडो खोदण रे दौरान

मजूर रे मिट्टी मांय दब जावण ऊं व्हयो। ई पाछे आयोग अखबरां मांय छपी खबरां माथे ध्यान देता थकां दो सप्ताह मांय विगतवार रपट मांगी है।

वाणिज्य मंत्री पीयूष गोयल भारत अर ब्रिटेन बीचे हाल मांय करी ज्या **मुक्त व्यापार समझौता—एफटीए** ने जबरदस्त बदलाव बतायो है। नई दिल्ली मांय श्री गोयल कह्यो के ओ करार केई हलकां मांय मौका खोले है अर दोन्यू देशां रा भला री सोच राखे है। वाणिज्य मंत्री इण ने भारत ओ हाल ताई रा सब ऊं मोटो कारोबारी करार बतायो।

श्री गोयल कह्यो के ई करार ऊं भारत री दुनिया मांय कारोबारी भागीदारी सारू नुवो मानदंड बणायी ज्यो है। एफटीए ऊं राजस्थान रा नगीना, गहणां, कपड़ां, मार्बल—भाटा, सीमेंट अर हाथ री कारीगरी ऊं बण्या सामान समेत भांत—भांत रा सामान री दिसावर मांय बिक्री ने बधावो मिलेला। पेश है एक रपट—

राज्यसभा सदस्य अर प्रदेश भाजपा अध्यक्ष मदन राठौड़ अर पाली ऊं चुणी ज्या लोकसभा सदस्य पी. पी. चौधरी ने सांसद रत्न पुरस्कार ऊं नवाजी ज्या है। आज नई दिल्ली मांय व्ह्या जळसा मांय संसदीय कार्यमंत्री किरन रिजिजू वां ने ओ पुरस्कार दीनो। देश रा 17 सांसदां अर दो संसदीय स्थायी समितियां ने ओ ईनाम दे र नवाजी ज्या। सदन मांय सक्रियता, बहस मांय भागीदारी, सवाल पूछण अर बेहतर विधायी कामकाज रा आधार ऊं ओ ईनाम दियो जावे है।

देश सारू जान निछावर कर देवण वाळा बहादुर फौजियां ने आज करगिल विजय दिवस री 26वीं वर्षगांठ रे मौके सिरधा भाव सागे याद कर्या जा रह्या है। रक्षा मंत्री राजनाथ सिंह कारगिल री लड़ाई मांय शहीद व्ह्या फौजियां ने आज करगिल विजय दिवस रे मौके नई दिल्ली रा राष्ट्रीय समर स्मारक माथे सिरधा भाव सागे याद कीना। लद्दाख रा द्रास मांय करगिल युद्ध स्मारक माथे खास जळसो राख्यी ज्यो। इण मांय खेल मंत्री मनसुख मांडविया अर रक्षा राज्य मंत्री संजय सेठ फूल चढ़ा र शहीदां ने याद कीना। प्रदेश मांय ई न्यारा—न्यारा कार्यक्रमों रे जरिये वां वीर योद्धावां ने नमन कर्यो जा रह्यो है जो करगिल री लड़ाई मांय देश सारू प्राणां री बाजी लगा दीनी ही। भीलवाड़ा अर चूरू मांय ई मौके खूनदान शिविर लगायी ज्या। बाड़मेर मांय युद्ध स्मारक माथे शहीदां ने सिरधा रा फूल चढ़ा र याद करी ज्या अर वीरांगनावां अर वां रा पिरवार वाळां रो मान करी ज्यो। ई मौके बारां मांय दो दिन री हथियारां री प्रदर्शनी लगायी ज्यी है। करगिल विजय दिवस रे मौके जोधपुर मांय ई ऐतिहासिक लड़ाई रो **रोमांचकारी जीवन पुनः** रे जरिये दरसाव करी ज्यो। इण मांय एनसीसी रा 800 कैडेट्स अर स्काउट गाइड्स भारत रा फौजियां री भूमिका निभाई। कोटपूतली—बहरोड़, पाली, जोधपुर अर सवाईमाधोपुर समेत न्यारी—न्यारी ठौड़ां करगिल शहीदां री याद मांय खास कार्यक्रम राख्यी ज्या।

प्रधानमंत्री नरेन्द्र मोदी मालदीव दौरा रा तैत आज वठे री राजधानी माले मांय राख्यी ज्या स्वतंत्रता दिवस समारोह मांय खास पावणा रा तौर ऊं सिरकत कीनी। इण ऊं पैली प्रधानमंत्री नरेन्द्र मोदी मालदीव रा उपराष्ट्रपति हुसैन मोहम्मद लतीफ सागे मीटिंग कीनी। दोन्यू नेता भारत अर मालदीव री दोस्ती रा बारा मांय चर्चा कीनी। वे बुनियादी ढाँचा विकास, प्रौद्योगिकी, जलवायु मांय बदलाव

अर ऊर्जा सरीखा हलकां माथे बातचीत कीनी। ई मौके श्री मोदी कह्यो के दोन्यू देशां बीचे गहरी दोस्ती ऊं खूब फायदो व्ह्यो है अर दोन्यू देश साझेदारी ने और मजबूत करण री मंशा राखे है।

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। हर महीना प्रसारित कर्या जावण वाळा ई कार्यक्रम री आ 124 वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। कार्यक्रम ओटीटी प्लेटफॉर्म वेब्ज माथे ई सुण्यो जा सकेला। मन की बात कार्यक्रम आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई प्रसारित कर्यो जावेला।

76वां वन महोत्सव काल जयपुर मांय राख्यो जावेला। जगद्गुरु रामानन्दाचार्य संस्कृत विश्वविद्यालय परिसर मांय व्हेवण वाळा ई कार्यक्रम मांय मुख्यमंत्री भजन लाल शर्मा, संसदीय कार्यमंत्री जोगाराम पटेल अर वन मंत्री संजय शर्मा ई सिरकत करेला। ई मौके पौधा रोप र आब-ओ-हवा ने गन्दी व्हेवण ऊं बचावण रो संदेश ही दियो जावेला। ई मौके परिसर मांय मातृवन बणा र पौधा रोप्या जावेला। ई सागे ई ड्रोन रे जरिये बीज ई रोप्या जावेला। कार्यक्रम मांय ई सागे ई **अमृता देवी वन संरक्षण पुरस्कार** ई दिया जावेला। जिला स्तर माथे ई वन महोत्सव राख्यो जावेला। सवाईमाधोपुर मांय वन महोत्सव रे दौरान 9 लाख पौधा रोपणो तैय करी ज्यो है। बाड़मेर री बीएसएफ फायरिंग रेंज मांय ई पौधा रोप्या जावेला। डूंगरपुर जिला रा सागवाड़ा मांय आज वन महोत्सव राख्यो ज्यो। ई दफा जिला मांय 15 लाख पौधा रोपणो तैय करी ज्यो है। चूरू मांय जिला रा प्रभारी मंत्री अविनाश गहलोत आज रतननगर मांय राख्यो ज्यो वन महोत्सव कार्यक्रम मांय सिरकत कीनी अर पौधा रोप्या।

गृह राज्य मंत्री जवाहर सिंह बेढ़म आज डीग जिला रा नगर नगर मांय सड़कां बणावण रा काम री सरुआत कीनी। ई काम माथे 97 करोड़ रुपया ऊं बत्तो खर्चो आवेला। वे 11 सड़कां बणावण रा काम री सरुआत कीनी अर पूरा व्ह्या काम जनता ने सूंप्या। गृह राज्य मंत्री श्री देवनारायण आवासीय बालिका विद्यालय पसोपा रा काम री ई नींव रखी। ई काम माथे करीब 19 करोड़ रुपया रो खर्च आवेला।

काल हरियाली तीज मनायी जावेला। इण ऊं पैली आज पारम्परिक उमाव सागे लोक पर्व सिंजारो मनायो जा रह्यो है। ई मौके महिलावां मेंहदी लगा र पारम्परिक रूप ऊं सजी-संवरी। ई मौके घेवर अर मिठाई री दुकानां माथे ई खूब रौनक निजर आयी। भरतपुर मांय ई उमाव सागे सावणी तीज री तैयारियां करी जा रही है। म्हाणा खबरनवीस बतायो के ई मौके बांके बिहारीजी समेत न्यारा-न्यारा मिंदरां मांय खास झांकियां सजाई जावेला।
